

## Senad Duran, dipl. geod. inž.



Nakon duže bolesti 17. 5. 2018. na Ahiret je preselio kolega Senad. Rahmetli Senad (Ahmeda) Duran, rođen je 07.11.1965. godine u Konjicu. Osnovnu školu i srednju građevinsku školu završio je u Konjicu. Poslije srednje škole upisuje se na Građevinski fakultet-Odsjek za geodeziju u Sarajevu, uspješno diplomira i stječe zvanje diplomiranog inženjera geodezije.

U ratnom periodu dao je nemjerljiv i stručan doprinos u odbrani BiH. Od 1997. godine zaposlen je u Službi za geodetske, imovinsko-pravne poslove i katastar nekretnina općine Konjic na poziciji pomoćnika načelnika. Aktivno učestvuje u obnovi porušene infrastrukture i stvaranju uslova za povratak izbjeglica na vlastito ognjište. Rješenjem Načelnika općine Konjic imenovan je za revizije i nadzor projekata kao što su: izgradnja puteva, mostovi, MHE – mini hidrocentrala, vodovodne mreže, itd. Učestvuje u GPS kampanji mjerenja-trig. tačaka: „Brekale“ G.Vakuf i „Borašnica“ Konjic. U periodu 1998-2003. godine je rukovodio aktivnostima izlaganja i uspostave katastra nekretnina u općini Konjic. Aktivno učestvuje u preseljenju katastra iz neuslovnih u nove uslovne kancelarije 2005. god. zgrada DPO-a.

Sastavlja projektni zadatak izrade DGP-a, na osnovu kojeg je u periodu 2006/07, izvršena digitalizacija i izrada DGP-a (digitalnog geodetskog plana), za općinu Konjic. Izradom DGP uspostavljen je geografski informacioni sistem (GIS), katastarski informacioni sistem nekretnina (KIS), koji omogućuju brže usluge pravnim i građanskim licima o njihovim nekretninama, te efikasniju opštinsku geodetsku službu kao servis građanima, ostalim službama i organima uprave.

Na Univerzitetu Džemal Bjedić, Građevinski fakultet 2007. angažovan je kao asistent na predmetu Geodezija. U međuvremenu Senadu je diagnosticirana ALS-amiotrofična lateralna skleroza, i započinje liječenja po klinikama: Bosne, Slovenije, Njemačke,... i Kine. Borbu sa ugroženim zdravljem nastavlja radno tako da 2012. godine predvodi kolege na obuci u softveru „Katastar.ba“. Cijeli radni vijek se trudio da katastar Konjic održi korak s vremenom uvodeći i primjenjujući nova naučna i tehnička dostignuća u oblasti geodetske struke.

Porodični život proveo je sa suprugom Senadom s kojom ima dva sina: Semira i Sameda, i kćerku Samru. Semir je diplomirao na Pravnom fakultetu u Sarajevu, Samra je maturant Gimnazije Konjic a Samed je učenik Prve osnovne škole u Konjicu. Nažalost medicina na današnjem stepenu razvoja nije pronašla odgovarajući lijek za ALS-u. Da bi ublažili posledice bolesti potrebnu pažnju i podršku imao je od supruge i djece.

Smrću našeg kolege Senada, izgubili smo čestitog čovjeka, kolegu uvijek spremnog za pomoć drugima i naravno prenijeti svoje veliko znanje o gruntovnici i katastru na mlade geodete. Geodetska struka je izgubila vrsnog stručnjaka, koji je otvorenosću i spremnošću pristupao rješavanju i najkomplikovanijih predmeta geodetske struke.

Našem Hadži Senadu dženaza je obavljena 18. maja 2018. godine na mezarju Orahovica. Ispraćen je od porodice, velikog broja prijatelja, kolega i sugrađana.

Neka je vječni rahmet našem Hadži Senadu...

*Nazif Nikšić*